

公開組

冠軍

【湖南桃花源懷古】鍾衛民

桃花影落沅江畔，上溯蓬山隔世塵。  
古洞摩崖通絕境，哀鴻有淚泣秦民。  
避兵劫難長埋劍，問訊新朝久不臣。  
放眼幽林空寂寂，人間何處武陵春。

亞軍

【漁父吟】蔡克明

湖山歲月任蹉跎，欸乃聲聲送逝波。  
釣罷江磯重撥棹，飄殘紅蓼似拋梭。  
三分明月天邊現，一葉扁舟水面過。  
不列鸕行鷗鷺隱，浪濤輕拍伴漁歌。

季軍

【七十書懷】吳其湛

虛擲光陰七十春，據鞍猶壯最堪珍。  
一杯邀月何辭醉，千卷撐胸不算貧。  
蘭植庭前香繞宅，銘題座右德為鄰。  
詩心濯得滄浪水，抑濁揚清入句新。

## 優異獎

(排名按姓氏筆畫序)

### 【秋懷】方富永

感惜芳時別逝波，鄉心迢遞對星河。  
千山月色離魂黯，一夜秋聲入夢多。  
籬外黃花幽意溢，天邊白雁錦書過。  
浮雲望斷遙相憶，悄向金風獨嘯歌。

### 【閒居】王祖厚

便賦閒居卜野鄰，薜蘿山鬼共蕭辰。  
林開霏霧嵐光淨，鳥聽嚶鳴雅意淳。  
隙地一畦瓜種美，殘書數卷蠹痕新。  
養生且幸無兼味，蔬筍猶能健此身。

### 【七十九生朝有作】白福臻

回頭七十八年春，百感蒼茫集此辰。  
暮景已斜何志業，青雲不見但風塵。  
縱然天地虛生我，豈合文章再讓人。  
一樹梅花籬落外，衝寒須信有精神。

### 【暮春送袁八詞丈還江南】林世鉅

江南歸路鏡中身，綠鬢漁郎老避秦。  
鼓枻更誰天寶唱，落花如此杜陵春。  
雨含湘竹斑啼鳥，波上君山青向人。  
襟袖幾痕戎馬涕，登樓休望海灣塵。

### 【山行見杜鵑花】郭維華

荒巒躑躅倍愁人，多難逢君最感親。  
彩筆攜霞千氣象，丹心傳火見精神。  
根移蜀苑終為客，血吐鵑魂竟負春。  
舊夢重歸繁故國，空餘紅淚送征塵。

## 公開組

### 特別獎

(排名按姓氏筆畫序)

#### 【落花】何永釗

九十春光瞬息過，關心花事又如何。  
茫茫前路悲無奈，草草勞生去已多。  
曉夢自憐香散漫，舊歡猶記鬢廝磨。  
馬嵬坡下淒涼史，千古誰人吊月娥。

#### 【重遊三峽經諸賢祠廟有感】岑植秋

欲上巫峰喚奈何，渺然遺迹沒煙波。  
追思聖業情猶憾，舉目清明氣自和。  
雲外清猿催熱淚，浪中神女綻梨渦。  
通靈漸解前賢意，一盞開懷奠綠河。

#### 【羊年世局】徐容

癸未方期慶吉辰，如何大地不回春。  
金融震盪財添赤，疫癘流行種變新。  
黠武窮兵哀彼美，忠君誤國憫伊人。  
祥羊鎮歲逢多劫，複製違天是禍因。

#### 【頌港前線醫護人員】郭偉廷

浩蕩悽惶癸未春，補天濟溺賴斯人。  
潛形癘虐瘟何酷，妙手慈悲暖可親。  
仁術仁心情懇摯，亦醫亦俠膽輪囷。  
杏林風義今猶古，橘井殊功典範新。

學生組

冠軍

【夜歸】

徐瑋 香港中文大學

中天朗月白無垠，漫興行歌到海濱。  
縱目浮雲聊寫意，沉思世務易傷神。  
泠泠夜露侵羅袖，杳杳春星落遠津。  
欄外一鷗隨浪沒，乘風應笑未歸人。

亞軍

【二泉映月】

洗憲漳 香港樹仁學院

冷泉上下銀光澹，偏照江湖落魄人。  
蕭颯松風吹解帶，鬱紆畫角寄吟身。  
殘弦豈曉肝腸苦，長夜怕聽更漏頻。  
昔日雷尊今在否，空餘落葉鎖階塵。

季軍

【香江肺炎即事】

黃令時 香港中文大學

莫向眾中去，城居多病鄰。  
相逢皆半面，一嗽怒旁人。  
伯有時驚鄭，桃源失避秦。  
爐峰三月早，慘淡不成春。

學生組

優異獎

(排名按姓氏筆畫序)

【賞杜鵑有感】

方秀瑩 香港中文大學

日暖春花發，盈梢血跡新。  
映山紅漫漫，臨水綠萼綦。  
好鳥棲枝囀，香苞惹蝶親。  
嗟余非望帝，未解恨無垠。

【題新海灣戰雲】

張鎮東 香港教育學院

大國妄為神，狂兵動萬鈞。  
烽煙迷朗月，彈雨苦蒸民。  
欺世申公義，沽名飽異珍。  
環球憤反戰，獨有餓狼親。

【水仙】

陳奕生 聖公會聖本德中學

新歲呈祥應，先春催發頻。  
幽香宜靜室，淑氣合寧神。  
貞白參青翠，靈光入素貧。  
只緣身寄託，清水絕風塵。

【雨後思鄉】

詹勝 香港樹仁學院

臥聞一夜雨聲頻，推枕方知窗已晨。  
歸燕初鳴朱閣上，浮萍常泊碧湖濱。  
花開嶺外天涯客，詩在峰頭物外身。  
多少迷離年少夢，傷心怕見故鄉人。

【大廚】

羅銘宇 迦密柏雨中學

英發雄姿唱短歌，神閒刀落向雞鵝。  
紅椒點綴增風味，蒸氣瀰揚燙熱鍋。  
數點辣油迎巨鑊，半杯洋酒煮花螺。  
佳餚豔彩隨香溢，堪似王廚饗阿哥。

學生組

特別獎

【別師友】

許文雅 潮州會館中學

青燈苦讀事難陳，失敗功成各有因。  
學藝禮儀欣接席，成材德業樂傳薪。  
研磨兩載情長在，教誨多方意倍珍。  
一別今宵期再會，嬋娟夜夜照離人。

香港公共圖書館  
HONG KONG PUBLIC LIBRARIES